



Ukkusissat, ulloq 10. juli 2016

Asasara Saalaaraq, asasakka Saalaaqqap ilaqtai, asasakka suleqatit qaaqqusallu tamassi tikilluaritsi.

KNI A/S sinnerlugu maani oqalugiarsinnaagama tulluusimaarpunga ataqqinartillugulu. Ullumikkut ulloq tamatsinnut pingaaruteqartuuvoq. Pisoq pingaarutilik immikkuullarissiq nalliussiniarlutigu katerippugut, taamaattumik ullormik malunnartitsiniarnerput ataatsimoorluta atussagutsigu pissusissamisoorpoq.

Katerippugut Sara Møllerip ukiorpassuarni KGH-mi/KNI-mi sulisimanerani ataqqiniarlutigu kiisalu Ataqqinartorsuup Dronningip nersornaasiuttagaanik saqqarmiulerniarlutigu.

Ullumikkut saqqarmiuliisinnaagama assorsuaq nuannaarutigaa.

Asasara Sara Møller Saalaaraq. Ulloq 9. December 1974 KGH-mi kingorna KNI-mik taaguuteqalersumi sulilerputit, taamanikkut niuertorseq Karl Petersen Kaalinnguaq sulisitsisorilerlugu. Ukiorpassuarni sulininni sullerillutit tunniusimallutillu suliasat assigiinngitsorpassuit suliarisarsimavatit.

Taamanikkut sulineq ullumikkumut sanilliullugu allaaneroqaaq. Suna tamarmi namminersuutaaneruvoq timikkullu artornareroqaluni. Kivitassat oqimaatsorpassuit nammaneqartarput ullumikkutuullu atortorissaaruteqarani. Pisiniarfimmili sulineq pisinianillu sullissineq nuannariuarsimavat.

Taamanikkut nioqquteqariaaseq kuartit pingasut, grammit, kiisalu iipilisiniartoqarpat oqimaalutaqqaarsinnarlugu kg-mut akianut naatsorsugassaasarput, qarasarissuusimagavillu illit nammineerlutit oqarnertuut naamik regnemaskinarpoq akii inereertarpasi. Taamanikkut karsit akileraasitsiviit SWEDA aamma moreertakkat atuupput, piffisallu ingerlanerani nioqqutissat tunisarsimasat kingumoortumik takoriaannaangilasi. Nunaqarfinni pisiniarfissorneq ullumikkutut inerisarneqartiginikuunngilaq, qerisunik nillataartunillu nioqqutit annikipput.

Ukiut sulileqqaarfippit nalaanni sulineq imaannaangittuuvoq, umiarsuaaralerinermi Lars Møllerip Hvidfiskeniip usii bramminik tulaanneqaraangata inuup nukii kisiisa atorlugit quersuarmut majuussorneqartarnerisa nalaanni suleqataasarsimavutit, taamanikkullu pisariaqartarsimavoq inuit piunnartut tamarmik ullormi ataatsimi sulisortarineqartarmata, inuit tunniusimasut ikiuukkumasut nunaqqatigiit ikioqatigiittut. Ullumikkut usingiaaneq taamanikkumut sanilliullugu oqinneroqaaq, taamanikkuusuuppat inuppassuit assartorusaagassaralui ataatsikkut assartortalernikuuasi 1990-kkulli ingerlaleranniit.



Taamanikkut aamma atuupput nioqqutissanut akilersuutinnguit moreertakkat nioqqutissanut tamanut akilersuutigineqartussat ataasiakkaarlugillu pussuit atorlugit ikkussoqattaagassat, ullumikkut qarasaasiaq toortalaaraanni ilisiviup saani akissaa aniatereertarpasi.

Ukiut ingerlanerini misigisarpassuaqarsimavutit. Allanguinerit annertuut kiisalu KGH-neraniit ullumikkut suliffeqarfiup nutaaliangorluni KNI-nngornera malinnaavigisimallugu. Ukiut ingerlanerini assigiinngitsunik pisortaqartarsimavutit aqqissuussaanerillu assigiinngitsorpassuarnik atugassarititaasut atorlugit sulisimallutit, sulinerilli ingerlatiinnarsimavat Nuugaatsiap pisiniarfiani aalajangersimasumik akuujuarsimallutit. Nammineq takutippat “sulineq suleqatillu nuannarigaanni ukiorpassuarni sulisoqarsinnaavoq”.

KNI A/S-imi Pilersuisumilu sulisutoqqani eqqaamiussinni tamani kiisalu pisiniartartorpassuarnit Pilersuisormiutut ilisarimanearputit, qularutiginnilaralu sullitassavit sutigut tamatigut sullississussatut tatigalutit saaffissaraatsit. Illillu Saalaraq niuertup suliassanut allaat amerlanerpaat tamaasa misilittagaqarfigaatit nalornisiginangillu suliarisinnaalernikuullugit, taamaattuunerillu illit nammineq inuttut qamuuna tulluusimaarutissaralugulu inuttut ataqqinaatigaat.

KNI A/S Pilersuisoq sinnerlugu KGH-mi/KNI-mi ukiorpassuarni sulisimaninnut uummannit pisumik qutsavigigaakkit. Ilaquttatit tamaasa aamma qutsavigiumavakka taakkuami ukiorpassuarni tapersersortuartarsimassagaatsit qularinngilara.

Naggataatigut ilaquttatillu pilluaqqujumavakkit siunissamilu ajunnginnerpaanik tamanik kissaallutit.